

hea te nui o nga taitara e riro mai i a koutou i runga i nga huarahi o te matauranga, kia mahara, ko o koutou toto he Maori tonu. Kia nui te aroha ki o koutou toto Maori. Aku tamariki, aku mokopuna, kia kaha. Hapainga tikatia e koutou te ingoa pai o Te Aute."

No muri i a ia ko Apirana Ngata. Ka mihi ki te Kawana-tianara, me tona hoa, he te Poari o Te Aute, me nga tamariki o te kura, katahi ka huri te nuinga o ana mihi ki nga tamariki tawhito o Te Aute. I whakaatu ia, ko te whare hui o te Kareti, ka hanga Maoritia a roto, ara nga heke, nga tui, me nga whakairo. Ma te Tai-rawhiti e peita nga heke, ma ratou ano hoki e mahi nga tukutuku. Ko nga whakairo me tuku ma Te Arawa. Ka inoi ia ki nga tamariki tawhito o Te Aute, ki nga rau tamariki o ia wahi o te motu, kia whai-whakaaro mai ki tenei mahi. Ko tona hiahia, kia rima pauna ma ia tamati tawhito, hei tuku mai ma tena ma tena hei aroha ki to ratou kura, kia waiho ai ma taua moni e whakarite nga raruraru e pa ana ki nga mahi whakairo.

TE AUTE KARETI ME HUKARERE KURA.

I ROTO i nga whakahaere o te hui i tu ki Tikitiki, Waiapu, i puta nga korero mo Te Aute me Hukarere.

Ko te whakaaro nui o te hui e penei ana:—Kanui te pai o nga whakahaere o Te Aute, te taha ki nga matauranga me te taha ki nga mahi ahu-whenua. Katahi ano ka penei rawa te toko maha o nga tamariki e paahi ana i te "matric" na enei tau i noho mai ai a Mr. Loten, hei tumuaki. I whakaatu a Atirikona Himikini, hei tohu mo te pai o nga akoranga mo te taha ahu-whenua, kua whakaaetia e te Hawkesbury Agricultural College o Ahitereria nga kaupapa ako ki nga mahi paamu o Te Aute. Mehemea kua paahi atu te tamaiti i Te Aute mo nga mahi ahuwhenua, kotahi te tau ka whakakorea ina tae ki Hawkesbury Kareti. He honore nui tonu tenei mo Te Aute.

Mo te taha ki Hukarere, he nui tonu nga kimi haere a te Hui i etahi huarahi e rite ai te tipu o nga mahi o Hukarere ki nga ahuatanga o Te Aute. Ko te whakaaro nui o te Hui e penei ana: kaore ano a Hukarere i whiti mai ki te ao hou. Ko nga tikanga, me nga whakahaere kei nga ahuatanga ano o mua. Otira no te tirotirohanga i etahi o nga huarahi hei painga mo Hukarere, ka uaua hoki te kitea.

I te tuunga mai o Atirikona Himikini te hekeretari o te Poari o aua kura, ki te whakamarama i nga ahuatanga o Hukarere, ka whakaatu ia i nga rereketanga o Hukarere i te Aute. I Te Aute kia paahi rawa te tamaiti i te ono o nga turanga ka uru ai ki reira. I Hukarere, whakaaetia ai nga tamariki kua paahi i nga turanga o raro iho. Mehemea ka hiahia te iwi Maori kia penei a Hukarere me Te Aute, ara ko nga tamariki